

et ha lassato signor di Damasco Giambardi El Gazelli, et hali dato tutte altre signorie fino a li confini di Gazara. Et ha scritto a questo signor Chayrbech, che lui non si debba partir, et hali mandato la vesta de confermarlo in la sua signoria; ma ben le zente che per el suo comesso sarano notade et scripte, subito le spazi da Cayro, et che le vadi a trovarlo dove el sarà con el suo campo. El qual va a la volta de Aleppo, et in quel loco farà la soa maona, et terminerà quello el vol far. Se dize el Signor aver scritto a Constantinopoli et a Salonichii, che la sua armata vegua a la Giaza; ma non si sa certo. Non se puol far meglio che star in ordine e aparechiati a la sua difesa, zoè el Monastier et Cypro, et non se fidar de zanze, perchè pochi intendono la volontà de questo can turco, che Dio per sua misericordia campi da la fortuna de questo crudelissimo can.

A dì 3 Marzo. Ozi ho parlato con alcuni cercassi quali da dolor pianzeva, digando: « Che fa cristiani che non vien a tor sto paese da le man de questo can tureo? ». Li risposi a proposito, e li domandai si 'l Turco era per passar al Monastier. Me disse de no; ma ben era partito da Damasco et andava verso Alepo con tutto el suo campo, et va contra la bareta rossa, el qual è molto grosso, e che era andato da dita bareta rossa più di 4000 mamaluchi, et ogni zorno se ne parte de qui dal Cayro, et vanno da la dita per la via de Bagadet. E disse, come el Signor turco se parti de Aleppo, se vederà cosse nove: non romagnirà de qui in guardia de Cayrbech e dil Cayro de fantarie dil Turco numero 3 in 4000 tra janizari e spachi, e uno capitano dil fiol de l'imperador de tartari con cavalli 200 tutti tartari.

A dì 4. Uno capo de arabi fiol di uno Benezabar ha rebelato a questo signor Cayrbech, et mandato zente a la strada, et preso alcuni spachi che portava danari che avevano scosso da la vila de la intrata dil Signor tureo, et hali tolto li danari et lassato andar li altri. Questo capo de arabi à zente assai et non dà obedientia ad alguno, neanche a suo padre. Questo signor Cayrbech mandò da lui uno messo con presenti, et una vesta; non volse niente, et la cosa stà cussi. Se dize Cayrbech voler far campo contra el dito; ma fin qui non à fato nulla.

A dì 8. È stà dito per alcuni, è venuto da Damasco nova esser venuto al Signor tureo uno ambascador di la bareta rossa, al qual el Signor lí ha facto grande onor, et vestito et mandato via con gran presenti, e dize esser stà fato paxe tra el Signor turco et la bareta rossa; ma non la credeno. De qui *etiam* disseno el Signor turco ha deliberato andar

al Monastier, et haver scritto a la sua armata venga a queste marine et a la Giaza. Fin qui non se intende altro da Damasco: se altro se intenderà per zornata aviserò.

Cerca a le specie, questa caravana da la Mecha è venuta molto povera de spezie; non à portà garofoli; canela poca; noxe, maziis nulla; zenzeri uno poco, val de qui ducati 28 al canter e 30 cajarin; canelle 90 et 100. È da pensar quel dia valer piper e garofoli; che pochi ne sono: altra sorte specie non zè. Se dize esser zonte nave 8 in Altor, ma non se intende quello è il cargo suo; se dize per el vulgo dite nave aver specie assai, non sanno la sorte. De qui, chi avesse arzenti vivi, si faria molto bene; val al presente ducati 100 e più al canter. De qui panni di ogni sorta val benissimo e *maxime* scarlati di Venezia; paonazi val m. 28 in 30 el pico, che soleva valer 10 in 12 fin 14 al più: pensi vostra magnificenza quel dia valer li altri alti di ponente. Iddio felice conservi vostra magnificenza per longo tempo. In pressa per el partir dil messo.

*A dì 12 Marzo 1518, in el Cayro.*

*Copia di una letera scritta nel Cayro per Francesco de Batista a sier Marco Dandolo dottor et cavalier capitano di Crete, data a dì 14 Marzo 1518, ricevuta a Venezia a dì 19 Zugno, per letere dil dito rezimento di Crete di 27 April.*

Magnifico et clarissimo patron e signor mio benignissimo.

A dì 12 di l'istante scrissi, mandate per via di Alexandria, per darle al patron di la nave ragusea qual è nolizata per Candia. Da poi, in questo zorno medemo di 12 Marzo è stà dito da persone venute di Damasco, come quello ambascador di la bareta rossa che fo tanto onorato dal Signor turco, da poi vestito e datoli li presenti e partito di Damasco da zorni tre, el Signor turco li mandò drieto et fezelo tornar, et hali fato tagiar la testa e tolloli ogni cossa. Et che 'l dito Signor turco era partito di Damasco, e aver lassato vice signor in Damasco Zanbardi El Gazeli, e fato governador e signor dil paese di Damasco e di Saffeto, Jerusalem et Gazara, con tutti soi teritori, *etiam* dil paese dil Gaur abitato da arabi. *Etiam* à dato el casandar l'á de la signoria di Tripoli a Campson Lazufi, la signoria de Aman a Rus Medi armiraglio di 1000

(1) La carta 294 \* è bianca.